

Wiehnachten – ik wünsk mi dat einfach

De harde Lockdown is d'r nu. Genau een Week vör Wiehnachten sitten wi d'r nu mit. Wat ik faken in de verleden Week van verscheden Lüü höört hebb? Oh, ik hebb doch noch gaar neet all Wiehnachtsgeschenken binnanner. Of: Oh, wat spietelk, nu word mien Termin bi d' Haarsnieder ofseggt. Of: De Wiehnachtsmarkt is ja dit Jahr ok neet.

Ja, dat is all neet mooi. Un dat de Kooplüü un de Hannelswelt daar nu unner lieden mutten, dat is ok neet mooi. Dat harren wi uns all seker anners vörstellt un ok anners docht. Man: Wi hebben genoeg to eten. Smachten mutten wi hier wiss neet. Wi hebben genug to drinken. Döst is bi uns kien Thema. Schoon Water is för uns so normaal, dat wi daar gaar neet mehr över nadenken mutten. Wi dreihen de Waterhahn open un daar kummt schoon Water rut. Wi brusen uns sogaar mit Drinkwater of! Stroom hebben wi, Lücht hebben wi. Warm is dat in uns Husen un Wohnens.

Disse Maant hebb ik faker över Wiehnachten un de Sinn van Wiehnachten nadacht. Heel seker is de Sinn van Wiehnachten neet, van Laden to Laden to lopen up Söök na dat beste, mooiste un düürste Geschenk. Ok neet, Wiehnachten na Fid-

*„Dat harren
wi uns all
seker anners
vörstellt“*

ANTJE LÜBBEN



Antje Lübben

KOLUMNE

Moin, Moin
Schrievers moje
allerbest **Spraak** hoop
Pläseer **Vertellsel**
Smüstern

Platt maakt

schischi of Tasmanien to flegen, umdat dat ja so wat Besünners is. Heel seker is de Sinn ok neet, up Wiehnachtsavend en „Plichtveranstalten“ mit 15 bit 20 Minsken to hebben, blot umdat man dat „to Wiehnachten bi uns so maakt“. De Sinn sitt ok wiss neet daar in, bi disse „Plichtveranstalten“ denn so vööl to eten, dat een sük mit Lievsehr un Panskniepen neet mehr rögen kann. Wiehnachtsstress – dat kann doch neet dat wesen, wat de Minsken sük wünsken. Villicht komen wi dit Jahr maal all en bietje runner. Flegen

neet mögelkst wied weg of laden neet mögelsk vööl Lüü in. Villicht sitten wi dit Jahr to Wiehnachten maal blot mit en heel paar Minsken binnanner. De Minsken, de uns wiss an 't Hart liggen. Seker giff dat wat Moois to eten. Tuffelsalaat un Wustjes villicht. Heel einfach un heel in Ruh. Villicht giff dat dit Jahr maal blot een Geschenk. Villicht hebben wi ok maal weer vööl Tied un können mitnanner proten. Över dat, wat wi uns för 2021 wünsken. Över dat, wat wi uns för uns Leevesten wünsken. Daar können wi seker ok en paar Kookjes bi eten. En Koppke Tee bi drinken. Villicht is dat ollerweltsk – man villicht ok heel neemoodsk. Mi is dat nettglied – ik wünsk mi dat einfach.